



Nowy wósadnik

Serbske cerkwine powěšći za łužyske wósady

Wendisches Kirchenblatt

december 2023



Cerkwja w Turjeju

Hartmut S. Leipner


Snaž to zwisujo z mójim starstwom, ale mě se zda, až něga jo było wěcej lamety ku gódam a wěcej žortow k silwesteroju. Tym nowym šposam se juž njamóžom smjaš. K tomu pšížo, až žorty wó Putinu ze wšym nowe njejsu. Wzeju se te stare, a město cara, Stalina abo Brežnewa jadnorje se zaměnijo mě. Znajošo ten? „Diktator pší wěšćařce: Co mě pšinja so pšichod? – Ty jěžoš pó Moskwje a luže se wjasele. – Jim pšikiwujom? – Ně, kašć jo zacynjony.“ Jo to směšne? Abo ten: „Putin, Trump a Kim Jon-Un sejže w lětadle, kenž wobgarnjo. Chto bužo wumóžone? – Słowjestwo.“ – Napšawdu? Gaby to jano tak jadnorje bylo, wumóžyš swět na tu wašnju. Pšed lětom su nam wulicowali, až naš nejwětšy problem jo wirus. Gaž ten raz bužo pšewinjony, móžo wšykno pó starem dalej hyš.

Putinowy februar lěta 2022 z tak pomjenjoneju specialneju operaciju w Ukrainskej jo pak pšišel, a na 7. oktobrje 2023 jo wugbała teroristiska organizacija Hamas njepšedstajobny nadpad Israela pód motom, až Palestina dej licha byš wót rěki až ku mórju. Což tej operaciji zjadnošijo, jo, až su-

sed žednogo pšawa eksistence njama. Wójna juž njejo žedna wójna, ale wulichowanje.

Naraz jo stojało wšykno bytše pšed wócyoma: Iluzija nimjernego měra na swěse jo se rozpušćila. Słowa Mahatma Ghandhi „Njejo žedna droga k měroju, měr jo ta droga“ su wótzabydnjone.

Wušej togo smy žywe w dobje multikrizow. Nic njebužo wěcej ako pjer-



wjej. Dejm wšykne krize nalicys? Klima, wójny, pandemije, energija, wobchad, gósparaštwó, demokratija, rolnikaštwó, mobilita, inflacija – kótary wobceřk słowjeskego žywjenja som zabył? Se wě, problemy našogo małego serbskego swěta hyšći k tomu pšidu. Jo to pšewjele, až to juž njamóžomy słyšaš? Žo jano dejmy zachopiš? Gaž jo žeń wulosowanja

Dr. Hartmut S. Leipner jo předsedař Spěchowanskego towaristwa za serbsku rěc w cerkwi z. t. a serbski lektor

mimo, pšawe lottowe licby pšecej znajoš. Wšake mudrostarje w socialnych medijach se pak kuždy zeń wjelicaju, až derje wěže, co pšizo.

Žišetko se narožijo ku gódam a janžel pšipowěžejo měr. *Njebójsó se, pseto lej, ja zapowědam wam wjelike wjasele, kótarež wšomu ludu se dostanjo. Až wam žinsa jo se narožil wumóžnik, kótaryž jo Kristus, ten Kněz, w Dabito-wem měsće. A to dej wam byś znamje: Wy namakajošo žišetko do pjeluchow pówite a we žłobje lažece. A ned běšo tam pódlu togo janžela mań njebjaskego ryšařstwa, te chwalachu Boga a žachu: Cesc buži Bogu we wušynje* (Lukas 2,10-14).

Zajmnje jo, až pósołstwo njejo jano měr, ale teke „*dobre spódobanje*“. Jo to same cowanje dowěrliwych na Ukrainje, we swětem kraju a na cełem swěše abo nadawk za tych, kenž se na drogu daju, nježiwajucych na swóje cwiblowanja? Na mójom cwiblowanju pitwaju wšak šěžke nažeje, móžom snaž žortnje groniš. Ja se mam za amerikańskim spisowašelom Thoma-



som S. Elliottom: „Za nas jo jano cynjenje. Zbytk njedej nas staraš.“ To groni teke, až dobra wóla k změnje jo notna. Drugu šansu za žywjenja gódný swět njamamy. K tomu pasujo ta dobra powěsć ku kóncoju: W lěše 1812 jo wulicył francojski matematikař Pierre-Simon Laplace tu wjelgin wusoku wě-rjepódobnosć, z kótarejuž witše slyń-co górjej žo. My se rady na tu pšed-powěsć spuščijomy.

Hartmut S. Leipner



ube sotšy, lube bratšy,

Ja cu groniš: To jo mój lud, a wóni budu groniš: Kněžo, ty sy naš Bog.^{Zach 13,9} To gronko ze Starego testamenta móžomy my ako mała dolnoserbska ewangelska wósada derje wobtwarziš. Móžomy to teke wižeš w zwisku z gronkom lěta 2023: *Ty, Bog, wižiš mě,*^{1 Mojz 16,13} kenž se póšěgujo na dramatiska tšojenje na zachopjeńku Biblije. Słužabna Hagar se musy rozsuziš, nic jano za sebje, ale z daloko segajucymi slědami za drugich a za pšiduce generacije. Ceji sy ty a zo ty zoš? – To jo wažne pšašanje w špatnych a dobrych casach. Ako za žowčo Hagar jo teke za nas wažne, až smy wót Boga wižone. Za mnjo jo to ten njewuzbytny zakład našeje dowěry, njewuzbytny zakład našogo procowanja.

W tej krotkej rozpšawje njejo móžno, naspomnješ wšykno, což smy wugbali w zachadnem lěše, my wót spěchowańskego towaristwa, gromaže ze žěłoweju kupku Serbska namša, ze serbskimi dušepastyrjami, ale teke z drugimi angažěrowanymi lužimi.

Ako Spěchowańske towaristwo za serbsku rěc w cerkwi z. t. smy małe zjadnošeństwo a drje wóstawamy małe. Ale smy wuznamny žěl serbskego towarišnostnego žywjenja Dolneje Łužyce. To jo wuslědk pilnego žěła našych cłonkow, lěcrownož w internych wobradowanjach cesto kontrowersnje diskutěrujemy, jo samo se jědernje wažimy pšaweje drogi dla. Žycym se pak, až pšecej zasej znak namakajomy ku konstruktiwności, w zmysle našogo šprucha „Bogu k cesći a Serbam k wužytojkoju“.

Dwa noweje cłonka smy mógli pšiwitaš lětoša w našom towaristwje, to jo farař dr. Stefan Reichelt a dr. Dieter Šwjela. To jo wjelgin rědnje. Dejali se dalej wó to procowaš, dalšne młode cłonki dobyš.

Našo towaristwo ma teke zgubjenje wobžatowaš. 5. oktobra 2023 jo wumrěł farař Sven Oliver Lohmann. Ako cłonk Lutherskeje wósady jo był wjelgin aktiwny w celem wokrejsu Chóšebuza. Jo sobu statkował w chóšebuskej synože a we wokrejsnej cerkwinej raže. Sven Oliver jo był wjelgin angažěrowany pši zasej wóžywjenje žěłabnosći Spěchowańskego towaristwa za serbsku rěc w cerkwi z. t. W lětach 2015 do 2018 jo był ako pókladnik cłonk pšedsedařstwa. Derjeměše serbskeje wósady jo jomu było wušobina pótrjebnosć. Jo mógał zdobywaš luži ze swójeju bogatosću na idejach a angažěrowanosću. Módlimy se za Svena Olivera Lohmanna: *Gaž Jezus – ako my wěrimy – wumrěł a górzej stanul jo, tak Bog zbužijo z Jezusom teke tych, kenž su wusnuli we njom a wón wježo jich do kšasnosći.*^{1 Tes 4,14} Daš jo jomu serbska zemja lažka.

W srježišću statkowanja towaristwa a žěłoweje kupki Serbska namša stoje namše w dolnoserbskej rěcy. Tak wjele namšow ako lětoša hyšći žednje njejsmy pšewjadli: Ku kóncoju lěta to bužo 19 namšow z tyma, kenž w decembrje stej planowanej. Wětšy žěl su dwójorěcne namše, 5 namšow jo wšak było cysto serbskich. Pšerězna licba namšarjow jo ako łoni wušej 90. Cu how nic na wšykne, ale na žedne wósebne namše spomnješ. Lěto jo se zachopiło ze pšewšo

ředneju serbsko-nimsko-ukrainskeju muzikoweju namšu w Žyłowje pód nawjedowanim faraški Kathariny Köhleroweje. Inicijatiwa jo wujšła wót Lize Walteroweje z Lipska. Spiwařka Olga Tokar a muzikařka Ilona Smoljančuk stej nas wobguslowaŕej z ukrainskeju muziku, kótaraž do wutšoby jo šła. – Wšyknje wěmy, kak wuglěda personalna situacija w našej cerkwi EKBO. Wšuzu fararje feluju, wjele městnow jo wakantnych. To se wustatkujo teke na Serbsku wósadu. Dwa wót našych serbskich fararjow, Cyril Pjech a Dieter Schütt, stej južo wušej 85 lět starej a njamóžomy wěcej z nima licyś na mšach. Dieter Schütt jo žaržał swójo slědne prjatkowanje lětosa na serbsko-nimskej namšy we Złem Komorowje. Smy se jomu wutšobnje wuzěkowali za jogo dłužkolětnu, njewomucnu službu. Jo wjelgin wažne, až dr. Madlena Norberg jo cyniła wukubłanje ako cesnoamtska lektorka. Wóna móžo něnto samostatnje namšu žaržaš. Z přředneju namšu jo se pšedstajiła 15. maja w Rogowje, a ned jo se dała do dalšneho žěła: To jo namša ku dnju wótwórjonego pomnika we Wětošowje a prjatkowanje na dnju reformacije w Serbskej cerkwi Města. – Wjaseliś se móžomy, až fararja Tobias Pawoł Jachmann a Simon Klaas wóstanjotej we Łužycy. 26. junija jo było zapokazanje w baršćańskej cerkwi sw. Nikolawsa. To teke groni, až Tobias P. Jachmann nadalej statkujo za nas ako serbski farař. Wón jo zasej nawjedował namšu z Bóžym blidom na dnju reformacije a pšewzejo teke serbsku gódownu namšu. – Slěpjańska wósada jo wuwitała ewangelskich Serbow z ceteje Łužyce na 77. Serbski cerkwiny žer. Wósebnje muzikaliski program projektowe-



Wužognowanje Ingolfa Kšenki

go chora pód nawjedowanim Geralda Šejna jo zagórił woglědarjow. – Serby z ceteje Łužyce su se teke pórali to dolnosakskego Wendlanda na tak pomjenjone Wendentage, kenž jo zorganizěrowało tamne towaristwo Wendenfreunde. Našo towaristwo jo se wobželiło ze stojnicu a z pšednoskami na wědomnostnem programje. Z wjelikim angažementom jo pšigótował Werner Měškank pšinoski Spěchowańskego towaristwa: Foto pokažo parament w tšich rěcach, w drjewjańšćinje, dolnonimšćinje a nimšćinje („*Sjō-tū vardoj tūji jajmą - Laat heilig warn dien Noom - Geheiligt werde dein Name*“). K tomu jo pšišło teke zložone łopjeno z Wóscenasom w drjewjańskej, dolnoserbskej a dolnonimskiej rěcy. Parament a łopjeno smy pšepódali wósaže w Lubolinje (Lübeln) na mšy pód gołym njebjom z něži 160 namšarjami. Pši młyńskej rěcce, žož wósadny pastyr jo dupił šesć žiši, su mócnje zazněli teke dolnoserbske kjarliže. Za kopicu katolskich Serbow z Górneje Łužyce, kótarež su se wobželili, jo to było wjelike pšechwatanje. – Jański swěžen w Kózlem 18. junija jo dožywił



premieru: Prědny raz jo była namša z wužognowanim jańskich rejtarjow dwójorěčna, což wósada a pšiglědarje su wjelgin chwalili. – Slědny wjerašk lěta 2024, kenž cu how naspomnješ, jo rozžognowańska namša za serbskego dušepastyrja Ingolfa Kšenku. Nježiwajucy na wjeliku górcotu jo pšichwatało wušej 135 luži z cełeje Łužyce (abo samo z cełeje Nimskeje) na wopomnišćo za wótbagrowanu wjas Liškow na kšomje wugloweje jamy. Christina Kliemowa wót kupki Serbska namša jo dała Ingolfoju Kšence słowo psalma 84 sobu na dalšnu žywjeńsku drogu: *Derje tym cłowjekam, kenž Bog za swóju móc žarže.*^{Ps 84,6} Wšykne pšibytnje su wopokazali cesć a žěk za statkowanje fararja Kšenki na dobro Serbskeje wósady ze skóńcym žognowanim na kšomje jamy.

To dej bys pšisamem wšo wó našych namšach. Na žeden part wšak njedejm zabys šulsku namšu. Pód liturgiskim nawjedowanim Kathariny Köhleroweje jo se ražilo, taku namšu zasej pšewjasć. Pšedewšym mamy za to wjelgin se žěkowaš komisariskemu wjednikoju Dolnoserbskego gymnaziuma dr. Matoju Guttkoju.


K někotarym drugim zarědowanjam. Serbski muzej jo pšepšosyl w nalěsu na Serbske bli-do, kenž jo było wósebne za Serbsku wósadu wjelgin zajmne. Gósc jo ga był 20. měrca serbska dušepastyrka Jadwiga Malinkowa ze Slěpego, z kótarejuž smy se rozgranjali wó aktualnej problematice wuměny mjazy nabóžninami. Wóna jo mógała nam wulicowaš wó swójjich nazgónjenjach w Rumuńskej, Syriskej a Libanonje. 28. apryla som ja dalej

wjadł w kooperaciji ze Šulu za dolnoserbsku rěc a kulturu bibliske koło, tenraz wó žywjenju pósoła Pawoła. Dr. Christiana Piniekowa jo dalej wjadła kurs „Serbsčina za luži cerkwje“. Wjelgin zajmne jo było serbske wótpódnjo w grodkojskej Serbskej cerkwi 23. apryla. Inicjatiwa jo wujšła wót tamneje domowinskeje kupki, kótaraž jo se žycyła teke serbsku nabóžninu. Wutšobny žěk słuša fararjeju Cyriloju Pjechoju, kenž jo se z Barlinja na drogu do Grodka dał. Serbska wósada jo se wobželiła swětkownicu ze serbskim programom w nocy wótworjonych cerkwjow Města. W Nimskej cerkwi smy prezentěrowali serbski program ansambela Resonantia z Lipska. Ta kupka jo se teke pšiwobrošila serbskej muzice a interpretěrowała wšake serbske spiwy z ranego baroka ze starych serbskich spiwańskich, mjazy drugim wót sławnego serbskego komponista Jana Krygarja. Wótgłos jo był wjeliki z nagromadu wušej 500 woglědarjami.

Ako kužde lěto smy teke lětosu wudali gronka Herrnhutarjow abo ochranojskeje bratšojскеje wósady w dolnoserbskej rěcy. Jo to



Noc cerkwjow z ansambelom Resonantia



Parament w drjewjan-
ščinje, dolnonimskej a
nimskej rěcy

južo 6. lětnik, a w pśidu-
cym lěše dalej zo. Kónc lěta 2022 su wujšli
knigły „Serbska cerkwja
w Dešnje“. Wudawař jo
był dr. Alfred Roggan.
STSRC jo pódpěrowało
projekt, ale głowny spě-
chowař jo był bram-
borska krajna centrala
za politiske kubłanje. To
pokažo, až knigły su wu-
směrjone głownje na
nimskich cytarjow, kenž
serbske wósebności na-
šeje cerkwineje historije
njeznaju.

Dalšne knigły, kótarež
pópšawem njejsmy
spěchowali, ale maju
direktny zwisk k našym

čłonkam, su „*Das Modell Friedland*“. Te knig-
ły móžomy teke pórucyś kuždemu, kenž se
zajmujó za serbske cerkwine stawizny. Tšeše
knigły toho lěta „Ze žišimi se módlis“ su cysty
projekt Spěchowańskego towaristwa. Bjato-
wańske teksty teologowki prof. Barbara
Städtler-Mach z Nürnberga smy wudali – ako
łoni wobzahnjone – w tšich rěcach (dolno-
serbski – pólski – nimski). Su pśedwižone za
žiši do 12 lět a ako dupjeński dar.

Dolnoserska liturgija něnto do dalokeje
měry ako žěłowy material za duchownych a
lektorow pśedlažy a móžo se wužywaś. Nowy
wósadnik, naš casopis Serbskeje wósady
wujžo lětosa dwa raza. Numer 20 jo był wó-
zjawjony w juliju, a numer 21 bužo gótowny

ku gódam. K regularnyma wuda-šoma změ-
jomy w pśiducom lěše dvě dodatnej wuda-
ši: jedno k serbskemu cerkwinemu dnju
w Gołkojcach a jedno k našej wustajeńcy „30
lět STSRC“. Ako w slědnem lěše su byli cerk-
winske informacije w Nowem Casniku wěcej
razow tak wobšyrne, až su wobpšimjeli dwa
abo tši boki Casnika, abo su wujšli dwa raza
wob mjasec. Dolnoserske Bóže słowo jo
nadalej słyšaš w rozgłosu RBB kuždu nježelu
abo na drugich swěženjach. Na mjazsobnu
wuměnu wó kwalise wusćełanjow smy góto-
wali mały workshop w rumnosćach chóše-
buskego studija RBB ze zagroniteju rozgłosa
za religiju a towarisnosť Ulrike Bieritz.

W slědnem lěše smy wó tom rozpšawili, až
Serbska wósada dej direktnje byś zastupjona
w chóšebuskej cerkwinej wokrjesnej synože.
Wokrjesne cerkwine wjednistwo jo to wob-
zamknuło. W nadawku Spěchowańskego to-
waristwa a žěłoweje kupki Serbska namša bu
Martina Golašojc wupóslana. Zastupnica jo
dr. Madlena Norberg. 17. nowembra jo wob-
zamknuła nazymska synoda nowe wustawki.
Tam jo póstajone, až Serbska wósada dosta-
njo wót pśiduceje legislatury wót lěta 2025
sem nic jano jedno ale stawnje dvě městnje.

To jo był krotki pśeglěd někotarych aktiwi-
tow STSRC. Dupołny pśeglěd zarědowanjow,
pśednoskow a zmakanjow namakajošo na
internetnych bokach www.serby-ekbo.de.
Ku kóncoju nam jano wóstanjo, wutšobnje se
wužekowaś wšykny m procowarjam Serbske-
je wósady za wšo, což wóni cynje za zdžar-
žanje serbskeje rěcy w cerkwi a wšuzi.

Luže w pusćinje

Werner Měškank

W pusćinje su luže,
zyma, nuza, suš;
chto ma kusk klěba,
chto wě pšawy puś?

WÓN huběgowarjam
dawa nažeju,
ščitaś co jich pšed
bědu a smjeršu.

refrain:

Sam tšašne mórjo njepšestupijoš,
sam spiwajucy zgubijo se głos.
Chwalony kraj jan wiziš z Jezusom,
z nim ruku w ruce pónaj Wóšca dom.

Njesmějomy móriś
zemske żywjenje.
Chto wěrnje hucy,
kak zachowaś je?

Bomy su nam sprěli,
kwětki huschnuli;
lej JOGO tyca
nad wšym promjeni.

refrain:

Sam tšašne mórjo ...

Lubosć bywa zymna
ako kšuty lod.
Chto hugój swět a
hugnajo wšen głod?

Wócam, ako nuzu
drugich njewiže,
dajo WÓN swětło,
hustrowijo je.

refrain:

Sam tšašne mórjo ...

Raz WÓN kažo wšym, se
sednuś za blida.

Puscina zasej
bužo zagroda,

Z tšachow bužo radosć,
z cuzby domownja,
na Bóžej zemi
budu njebjesa.

refrain:

Sam tšašne mórjo ...

pó: „Menschen in der Wüste”, tekst: Klaus Weyers (1933-2019),
muzika: *Hatikwah* התקוה, Naftali Herz Imber (1856-1909).

78. Serbski ewangelski cerkwiny žen



Gotkojce

2.6.2024

Kolkwitz

10:00 swěžeńska namša,
Bóže blido a žíšeca namša

12:00 wobjed

13:00 wósadny swěžeń:

- ◇ kósobuskí chor a chor DSG
- ◇ wulět z kremserom do Cazowa
- ◇ wósadne spiwanje a kafejpiše
- ◇ gotkojskej fararja Fryco a Tešnar
- ◇ žíšecy program

15:30 wužognowanje

RBB a MDR wusćetatej



10:00 swjedženske kemše,

Bože wotkazanje a džěcace kemše

12.00 wobjed

13:00 wosadny swjedžen:

- ◇ Kósobuskí chór a chór DSG
- ◇ wulět z kremserom do Cazowa
- ◇ wosadne spēwanje a kofejpiše
- ◇ Gotkojskaj fararjej Fryco a Tešnar
- ◇ džěcacy program

15:30 žohnowanje

RBB a MDR wusyćatej



Ja wóstanu w Kněžowej wjažy nimjernje. (Ps 23,6)



1	14	14	4
11	7	6	9
8	10	10	5
13	2	3	15

Cerkwina pratyja wót januara do junija 2024

01.12.2023-22.02.2024 Serbski muzej w Chóšebuzu: Wustajeńca

„Darjona wěda: Bogumiła Šwjelowe derbstwo“

07.01.2024 (prědna nježela pó tšoch kralach) 10:00 Žylow: Serbsko-nimska muzikowa namša (farańka Katharina Köhlerowa)

14.01.2024 (druga nježela pó tšoch kralach) 10:30 Drjejce: Serbsko-nimska namša (dr. Hartmut S. Leipner)

15.01.2024 16:30 Serbske wósadne zmakanišćo w Chmjelowje: Prědne zmakeanje žěłoweje kupku Serbska namša + pósejženje pšedsedařstwa Spěchowańskego towaristwa

17.01.2024 18:00 Serbski muzej w Chóšebuzu: Serbske blido „Bogumił Šwjela w pólu napnětosćow nimskego a serbskego nacionalizma“ (dr. Hartmut S. Leipner a druge)

25.02.2024 (druga nježela spótnego casa) 11:00 Bórkowy: Serbsko-nimska namša (dr. Hartmut S. Leipner, dr. Madlena Norberg)

31.03.2024 (jatšowna noc) jatšowne spiwanje na jsach

01.04.2024 (drugi jatšowny swěžeń) 9:30 Picnjo: Serbska jatšowna namša (f. Katharina Köhlerowa)

25.04.2024 19:00 Serbski dom w Chóšebuzu: Wótwórjenje wustajeńce „30 lět Spěchowańske towaristwo za serbsku rěc w cerkwi z. t.“

19.05.2024 (swětkownica) 19:00 Chóšebuz: Noc wótwórjonych cerkwjow

20.05.2024 (drugi swětkowny swěžeń) 14:00 Turjej (dr. Hartmut S. Leipner)

02.06.2024 (1. nježela pó swětej Tšojosći) 10:00 Gołkojce: Serbski ewangelski cerkwiny žen

07.-09.06.2024 Frankobrod nad Odru:

Pódzajtšnoeuropejske dny zmakeanja kšesćijanow. Serbski program w zwisku z 78. Serbskim ewangelskim cerkwiny dnjom w Gołkojcach. 07.06.2024 16:00 Cerkwja sw. Jura we Frankobrože: Serbska namša (farańka Katharina Köhlerowa).

1	14	14	4
11	7	6	9
8	10	10	5
13	2	3	15

17.07.2024 7:30 Dolnoserbški gymnazium w Chóšebuzu: Serbska šulska namša pla pomnika Luthera (farańka Katharina Köhlerowa)

22.07.2024 15:30 Serbski dom w Chóšebuzu: Pšednosk k wustajeńcy „30 lět Spěchowańske towaristwo za serbsku rěc w cerkwi z. t.” (dr. Hartmut S. Leipner)

25.08.2024 (13. nježela pó swětej Tšojosći) 14:00 Zły Komorow: Serbsko-nimska ekumeniska namša (farań Manfred Schwarz, farań Udo Jäkel)



Serbska šulska namša

08.09.2024 (15. nježela pó swětej Tšojosći) 10:00 Wětošow: Serbsko-nimska namša ku dnju wótwórjonego pomnika (dr. Madlena Norberg)

29.09.2024 (sw. Michała) Brjazyna: Błosański cerkwiny žeń

06.10.2024 (žnjowny swěžeń) 14:00 Ptačecy: Serbsko-nimska drastwina namša (farań dr. Stefan Reichelt)

31.10.2024 (swěžeń reformacije) 10:00 Janšojce: Serbska namša z Bóžym blidom (farań Tobias Pawoł Jachmann)

31.10.2024 (swěžeń reformacije) Głowna zgromažina Serbskego ewangelskego towaristwa

30.11.2024 14:00 Serbske wósadne zmakanišćo w Chmjelowje: Wuzwólowańska zgromažina Spěchowańskego towaristwa za serbsku rěc w cerkwi z. t.

08.12.2024 (druga nježela pšichoda) 14:00 Huštań: Serbsko-nimska namša (farańka dr. Astrid Schlüter)


25.12.2024 (gódownica) 10:00 Serbska cerkwja w Chóšebuzu: Serbska gódowna namša (farań Tobias Pawoł Jachmann)

Dokradnjše aktualne informacije w serbskej a nimskej rěcy su na našych internetnych bokach www.serby-ekbo.de | Genauere aktuelle Informationen auf Wendisch und Deutsch finden Sie auf unseren Internetseiten www.serby-ekbo.de

Kontakty



Serbska wósada w Ewangeliskej cerkwi Barlinja–Bramborskeje–šlazyńskeje
Górneje Łužyce:  www.serby-ekbo.de <Serbska.Wosada@posteo.de>




žěłowa kupka Serbska namša na facebooku:

 www.facebook.com/groups/serbskawosada



Spěchowańske towaristwo za serbsku rěc w cerkwi z. t.

 c/o kupka Serbska namša, Droga Gertraudty 1, D-03046 Chóšebuz

 W.-Rathenauowa droga 16, Chmjelow

bankowy zwisk: Serbske cerkwine towaristwo

žarjawnica Sprjewja–Nysa, IBAN DE21 1805 0000 3302 1228 44, BIC WELADED1CBN

wužywański zaměr: Za Serbsku wósadu

pśedsedař Spěchowańskego towaristwa za serbsku rěc w cerkwi z. t.

dr. Hartmut S. Leipner <hartmut.leipner@posteo.net>  +49 174 6997743

nawjedujuca serbska duchowna Katharina Köhlerowa, faračka w Dešnje

<ev.pfarramt.dissenspreew@t-online.de>  +49 35606 257

serbska dušepastyřka Jadwiga Malinkowa, faračka w Slěpem

<jadwiga.mahling@gemeinsam.ekbo.de>  +49 35773 998244



Pśiducy Nowy wósadnik wujžo k jatšam 2024.

Impresum

Nowy wósadnik: Serbske cerkwine powěšći za Łužyske wósady.

numer 20, žnjojski/julij 2023. ISSN: 2367-1971.

wudawař: Spěchowańske towaristwo za serbsku rěc w cerkwi z. t.

techniske pśigótowanje: Serbske nakładnistwo w Chóšebuzu

zagronity redaktor: dr. Hartmut S. Leipner, Pśi Góramšicy 29, D-03042 Chóšebuz

<hartmut.leipner@posteo.net>

Nowy wósadnik wuchada jadnab dwójcy wob lěto.

wobraze: H. S. Leipner, wikipedija

All rights reserved © **WV** Cottbus/Chóšebuz 2023.